





中州集卷第十

癸集

○三知己

三知己溪南詩老辛愿 三十首

愿字敬之福昌人其大父自鳳翔来居縣西南女几山下以力田爲業敬之自號女几野人年二十五始知讀書取白氏諷諫集自試一日便能背誦乃聚書環堵中讀之書至伊訓詩至河廣頗若有所省欲罷

不能因更致力焉音義有不通者搜訪百  
至必通而後已有一事關十年者由是博  
極群書於三傳為尤精至於內典亦稱該  
洽杜詩韓筆未常一日去其手作文有綱  
目不亂詩律深嚴而有自得之趣性野逸  
不脩威儀貴人延客敬之麻衣草屨足胫  
赤露坦然於其間劇談豪飲旁若無人高  
獻臣為河南治中聞其名引為上客及獻

臣為府尹所誣敬之亦被訊掠幾預一網  
之禍自是人以敬之之名為諱絕不與交  
不二三年日事大狼狽田五六十畝歲入  
不足一牛屢為追胥所奪竟賣之以為食  
眾雖嗷嗷張口待哺雅負高氣不能從俗  
俯仰迫以飢凍又不得不與世接其枯槁  
憔悴流離頓踣往往見之于詩元光初予  
與李欽姊在孟津敬之自女几來為之留

數日其行也欽叔爲設饌備極豐腆敬之  
放箸而歎曰平生飽食有數每見吾二弟  
必得美食明日道路中又當與老飢相抗  
去矣會有一日辛老子僵仆柳泉韓城之  
間以天地為棺槨日月為含襚狐狸亦可  
螻蟻亦可耳予二人爲之惻然敬之佳句  
極多如自怜心似魯連子人道面如裴晉  
公萬事直須稱好好百年端欲付休休院

靜寬留月窗虛細度雲浪翻魚出浦花動

鳥移枝之類恨不能悉記耳

木栖云吟窗  
醉几秋風晚

只許幽人箇裏知三鄉光武廟云万  
山青遶一川斜到其處知爲工也

予嘗

論敬之士之有所立必藉國家教養又兄  
淵源師友講習三者備而後可喻如世之  
美婦多出於膏腴甲族薰醲含浸之下閭  
閻間非無名色一旦作公夫人則舉步羞  
澀曾大家婢不知其理然也故作新人材

言教育也獨學無友言講習也生長見聞  
言父兄也至於傳記所載西子乃苧蘿山  
采薪氏之女越君臣教之容止七日而納  
之王遂能惑夫差傾吳國豈常理也哉敬  
之落落自拔耿耿自信百窮而不憫百辱  
而不沮任重道遠若將死而後已者三十  
年亦可謂難矣南渡以來詩學為盛後生  
輩一弄筆墨岸然以風雅自名高自標置

轉相販賣少遭指摘終死為敵一時主文  
盟者又皆汎愛多可坐受愚弄不為裁抑  
且以激昂張大之語從吏之至比為曹劉  
沈謝者肩摩而踵接李杜而下不論也敬  
之業專而心通敢以是非白黑自任每讀  
劉趙雷李張杜王麻諸人之詩必為之探  
源委發凡例解絡脉審音節辨清濁權輕  
重片善不掩微類必指如老吏斷獄文峻

網密絲毫不相貸如衲僧得正法眼徵詰  
開示幾於截斷衆流人有難之者則曰我  
雖不解書曉書莫如我故始則人怒之罵  
之中而疑之已而信服之至論朋輩中有  
公鑒而無姑息者必以敬之爲稱首蓋不  
本於教育不階於講習不出於父兄而卓  
然成就如此然則若吾敬之者真特立之

士哉

劉景玄趙宜之雷希顏李欽叔  
張仲經杜仲梁王仲澤麻知幾

亂後

兵去人歸日花開雪霽天川原荒宿草墟落動新  
煙困鼠鳴虛壁飢鳥啄廢田似聞人語亂縣吏已

催錢

贈趙仲常

名憲宜之從弟詩有黃塵袞袞  
時隨脚華髮蕭蕭老墜頭之句

趙子年雖小論詩樂最深秋風凡幾首冬日更多  
吟老大吾無力文章爾用心荒山松竹底莫厭數  
相尋

過崧山

催老年光袞袞來好懷知欲向誰開箕山潁水春  
風裏呼起巢由共一椽

隆德故宮

虵分鹿死已無秦五十年来漢苑春問著流鶯無  
一語柳條依舊拂墻新

同趙長水泛舟

洛水秦山晚自澄孤洲煙樹綠相仍波搖朗月浮

金鏡嶺隔華星斲玉繩但覺轉船驚白鳥豈煩揮  
翠怒青蠅風塵浩蕩飄蓬裏愧似林宗陪李膺

山寒

山寒春靜早關門新月微光照短垣可恨暮雲欺  
落景却將殘靄助黃昏

陋室

陋室何妨似燕窠暮年終得返魚蓑壺中日月時  
常好枕上功名不足多往古來今真夜旦高天厚

地一置羅鹿門幸有龐公樂牛角徒爲甯戚歌

亂後還三首

兵戈爲客苦思鄉春暮還鄉却自傷典籍散亡山  
閣冷松筠憔悴野園荒鶯銜晚色啼深樹燕掠春  
陰入短牆鄰里也知歸自遠競將言語慰淒涼

又

亂後還家春事空樹頭無處覓殘紅棠梨受雪霑  
新雨楊柳聽綿颺晚風談笑取官驚小子艱難爲

客媿衰翁殘年得見休兵了收拾關身守桂叢

又

春來漂泊心情減老去艱危氣力微芳草際天愁  
思遠干戈滿地故人稀懷金躍馬時何有問舍求  
田事已違糲食敝衣聊自足白頭甘息漢陰機

題游彥明林園三首

先生未老厭儒冠築屋栽籬守歲寒經史日長常  
滿桮魚蝦溪近得供盤幽花入室無多種瘦竹關



情只數竿蕭洒遠辭車馬跡求官何必近長安

又

城郭繁華斷往還林園幽闕養高閑花低暖藥斜  
窺水竹亞晴梢巧避山尊俎歲時君得意風埃南  
北我何顏丹房藥鏡游心久不惜哀矜洗病孱

又

不礙遙看冷翠微儘教叢竹暎窗扉籬根倚水知  
魚樂屋角隣花鳥自啼濁酒野芹安已久華軒高

馬到從稀人間回首皆堪鄙兼汝幽棲得所依

贈劉庵主

劉遠  
貴族

蚤薄軒裳貴高尋綺皓蹤一囊閣里藥六尺水雲  
筇午枕眠芳景晴簷望遠峯柴門常不掩應得野  
夫從

函關

雙峯高聳大河旁自古函關一戰場紫氣久無傳  
道叟黃塵那有棄縑郎煙迷短草秋還綠露浥寒

花晚更香共說河山雄百二不堪屈指算興亡

贈趙宜之二韻

夫子今詞伯胡爲遠帝京青雲無轍迹白髮有柴荆  
鬼戲多年病人高四海名麟經方有缺無惜繼  
丘明

又

轉徙家無地逢迎客有尊光陰連病枕天地一愚  
軒霜雪青松古風塵白壁溫從渠投隙者袞袞向

金門

送裕之往許州酒間有請予歌渭城烟雨者  
因及之

白酒留分袂青燈約對床言詩真漫許知己重難  
忘爽氣虛韓岳文星照許昌休歌渭城柳衰老易  
悲傷

寄裕之

青雲一別阮家郎甚欲題詩遠寄將好句眼前常

蹉過佳人心上不曾忘誰家秋月茅亭底何處春  
風錦瑟旁昌谷煙霞久寐莫歡遊還肯到三鄉

山園

歲暮山園懶再行蘭衰菊悴頗關情青青多少無  
名草爭向殘陽暖處生

李講議汾 三十五首

汾字長源平晉人系出雁門曠達不羈好  
以奇節自許避亂入關京兆尹子容愛其

才招致門下留二年去之涇州謁張公信  
甫一見即以上客禮之自是游道日廣然

關中無一人敢與相軒輊者元光末用薦

書得從事史館舊例史院有監修宰相為

之同脩翰長至直學士兼之編修官專纂

述之事若從事則職名謂之書寫特抄書

小史耳凡編脩官得目錄分受之纂述既

定以藁授從事從事錄潔本呈翰長平居

無事則輸長及從事或列坐飲酒賦詩一  
預史事則有官長掾屬之別長源素高亢  
不肯一世乃今以斗食故人以府史蓄之  
殊不自聊高張諸人率以新進入館史家  
凡例或未能盡知就其所長且不滿長源  
一笑故刊脩之際長源在旁則蓄縮慘沮  
握筆不能下長源正襟危坐讀太史公左  
丘明一篇或數百言音吐洪暢旁若無人

既畢顧四坐漫爲一語云看秉筆諸人積  
不平而雷李尤所切齒乃以嫚罵官長訟  
于有司然時論亦有不直雷李者故證左  
相半踰年不能決右丞師公以傷風化爲  
嫌遣東曹掾置酒和解之不得已乃罷尋  
入關明年駢數馬來京師日以馬價佐歡  
道逢怨家則畫地大數而去又明年相山  
公仙在鄧之西山長源往說之署行尚書

省講議官既而恒山與參知政事思烈相  
異同頗謀自安懼長源言論欲除之遽之  
泌陽竟爲所害長源孝友廉介過人者甚  
多寧寒餓而死終不作寒乞聲向人人亦  
以此愛之平生以詩爲專門之學其所得  
爲尤多如洛陽才子懷三策長樂鐘聲又  
一年清鏡功名兩行淚浮雲親舊一囊錢  
煙波蒼蒼孟津渡旌旗歷歷河陽城長河

不洗中原恨趙括元非上將才三輔樓臺  
失婦燕上林花木怨啼鶻空餘一掬傷時  
淚暗隴昭陵石馬前同輩作七言詩者皆  
不及也辛卯秋遇予襄城盃酒間誦關中  
往來詩十數首道其流離世故妻子凋喪  
道塗萬里奔走狼狽之意雖辭旨危苦而  
耿耿自信者故在鬱鬱不平者不能掩清  
壯磊落有幽并豪俠歌謠慷慨之氣此詩

兵火中散亡今就其少作予所能記憶者  
錄之  
四首

陝州

黃河城下水澄澄送別秋風似洞庭李白形骸雖  
放浪并州豪傑未凋零十年道路雙蓬鬢萬里乾  
坤一草亭八川嶺陵霜樹老傷心休折柳條青

州址

州址光風艷綺羅南來扈從北人多梨園法曲懷

奴舞月窟新聲倩女歌紫禁衣冠出金馬青樓阡  
陌瞰銅駝薄游却憶開元日常逐春風醉兩坡

再過長安

細柳斜連長樂坡故宮今日重經過一時人物存  
公論萬里雲山入浩歌白髮歸來幾人在青門依  
舊少年多自怜季子貂裘敝辛苦燈前讀揣摩

汴梁雜詩四首

天津橋上晚涼天鬱鬱皇州動紫烟長樂觚稜青

似染建章馳道直于絃犬牙磐石三千國聖子神  
孫億萬年一榮治安經濟了漢庭誰識賈生賢

又

琪樹明霞五鳳樓夷門自古帝王州衣冠繁會文  
昌府旌戟森羅部曲戾美酒名謳陳廣座凝笳咽  
鼓送華輶秦川王粲何爲者憔悴囂塵坐白頭

又

樓外風煙隔紫垣樓頭客子動歸魂飄蕭蓬鬢驚

秋色狼藉麻衣浣酒痕天塹波光搖落日太行山  
色照中原誰知滄海橫流意獨倚牛車笑孝孫

又

寥落關山對月明客窗送夜夢魂驚二年岐下音  
書絕八月河南風露清冉冉暮愁生草色迢迢秋  
思入蟲聲誰知廣武英雄歎老却窮途阮步兵

上清宮三韻

憶昔秋風從茂陵詞臣忝預漢公卿瑤池宴罷西

王母翠輦歸來北斗城石馬嘶殘人事改劫灰飛  
盡海山平唯餘太一池邊月伴我驂鸞上玉京

又

蒼梧雲氣赤城霞綿絡鈞天帝子家仙掌高承九  
霄露霓旌遙駐五雲車昆明火劫驚人世瀛海風  
濤撼客槎醉裏忽逢王子晉玉笙吹上碧桃花

又

千劫塵緣謝吏曹道山仙闕事遊遨樓臺縹緲滄

溟濶宮殿森羅紫極高幾代雲孫接仙李千年王  
母醉蟠桃詩成便欲還山去猶待君王賜錦袍

避亂陳倉南山回望三秦追懷淮陰侯信漫

賦長句

憑高四顧戰塵昏鶉野山川自吐吞渭水波濤喧  
隴阪散關形勢輒興元旌旗日落黃雲戍弓劍霜  
寒白草原一飯悠悠從漂母誰怜國士未酬恩

雪中過虎牢



蕭蕭行李憂弓刀踏雪行人過虎牢廣武山川哀  
阮籍黃河襟帶控成臯身經戎馬心逾壯天入風  
霜氣更豪橫禦賦詩男子事征西誰為謝諸曹

清明

鳴珂振轂滿重城春日綿綿老燕鶯人在碧雞坊  
外住澹隨流水過清明

下第

學劍攻書謾自奇回頭三十六年非春風萬里衡

門下依舊并州一布衣

磻溪

封侯輸與曲如鉤冷坐磻溪到白頭老婦厨中莫  
彈缺白魚留待躍王舟

感寓述史雜詩五十首 辨序

錄五首

正大庚寅予行年三十有九獻賦明庭為  
有司所病遂有不遇時之歎阜衣斗食從  
事史館以素非所好愈鬱鬱不得志卧病

中僻居蕭條盡日無來人緬惟先哲凡所以  
 以進退出處之際窮達榮辱之分立身行  
 道建功立事關諸人事者竊有所感焉於  
 是始自騷人屈平以來下逮漢晉隋唐諸  
 公終之以遠祖雁門武皇作為述史詩五  
 十首以自慰其羈旅流落之懷述近代則  
 恐涉時事故斷自唐以下不論嗚呼三百  
 篇大抵皆聖賢感憤之所為作也余以愚

忠謬信獲譏于斯世久矣非敢示諸作者  
 庶幾後世有揚子雲者出或能亮予之宿  
 心是歲秋七月既望并州人李汾引

蘇客卿秦

游說諸侯獲上卿賈人脣舌事縱橫可憐一世癡  
 兒女爭羨腰間六印榮

韓淮陰信

仗劍淮陰去復還舉頭西望識龍顏堂堂竟握真

王印未害男兒辱胯間

叔孫奉常通

秦時博士魯諸生漏網驪山百丈阮邂逅劉郎習  
綿蕪便能彈壓漢公卿

馬中令周

脚踏長安陌上塵布衣西上欲誰親君王不省常  
何策憔悴新豐一旅人

遠祖雁門武皇

死心唐室正諸侯鐵馬南來隘九州當日三垂岡  
上意諸孫空抱腐儒羞

擬張水部行路難

洛陽行人心欲折半年西州信音絕彈箏峽口兵  
塵高半夜心懸隴山月君不見嗷嗷失群鳥淚盡  
眼流血潼關晝閉漢使稀安得慰我生離別

雲溪曉泛圖

曉景澹明月落影潭西丘晴川挂煙樹光拂雲河

流楓林入行色關山生白頭  
兼兼画中人憶我秦川游  
君帆渺何許儻下滄浪洲  
滄浪吾有約寄謝同盟鷗

古月一篇爲裕之賦

古月天不收敵君三萬秋天孫弄明鏡光湧雲間  
流憶管放逐江南州金陵女兒歌權謳草裹烏紗  
巾散著紫綺裘酒酣把玉笛直欲捫參歷井騎斗  
牛醉中呼兒搖雙舟吾欲乘流下石頭起來茫茫

視八極萬里只有元丹丘丹丘子游人間風塵何  
爲往復還玉華山人近招我九日朝帝蒼梧山

西歸

擾擾王城足是非不堪多病決然歸只因有口談  
時事幾被無心觸禍機日暮豺狼當路立天寒鵬  
鷂傍人飛終南山色明如畫何限春風筍蕨肥

避亂西山作

三月都門晝不開兵塵一夕捲風回也知周室三

川在誰復秦庭七日哀鴉啄腥風下陽翟草銜寬  
血上琴臺夷門一把平安火定逐恒山候騎來

李戶部獻甫

一十三首

獻甫字欽用欽姊從弟也兄欽止欽若皆  
中朝名勝家故將種而同時四進士人門  
之秀照映一時欽用博通書傳於左氏及  
地理之學爲精爲人有幹局心所到則絕  
人遠甚故時人有精神滿腹之目歷咸陽

簿辟行臺掾屬正大初夏人請和朝廷以  
馮子駿往議欽用預行夏使有口辯馮善  
人無以折之往復之際至以歲幣爲言欽  
用不能平從竊進曰夏國與敝邑和好百  
年今雖易君臣之名而爲兄弟之國使兄  
而輸幣寧有據耶曰兄弟且不論宋日曾  
與吾家二十五萬匹典故具在君獨不知  
耶金朝必欲脩舊好非此例不可欽用作

色曰使者尚恐言耶宋以歲幣餽君家而  
賜之姓岸然以君父自居夏國君臣無一  
悟者誠謂使者當以爲諱乃今公言之使  
者果能主此議以從賜姓之例敝邑雖歲  
捐五十萬某請以身任之夏使語塞和議  
乃定使還朝廷錄其功授慶陽提帥府經  
歷官尋辟長安令京兆行臺所在供須之  
繁急于星火欽用所以處之者常若有餘

縣民賴之以安入爲尚書省掾壬辰之兵  
奏充行六部員外郎守備之策時相倚任  
之以切遷鎮南軍節度副使兼右警巡使  
車駕東巡死于蔡州之難時年四十所著  
詩書文號天倪集者留京師欽用死其家  
亦破非同年華陰王元禮購得之幾有人  
琴俱亡之恨然則文字言語之傳與否亦  
有數存於其間耶

夏夜

銀潢淡淡沒疎星一陣涼從雨後生  
仰看浮雲成獨卧數圍蛛網絡中庭

九龍池春望

五年外地看清明袖手低回過客亭  
謝絮楚萍無定著春光如我更飄零

興慶池書所見

短短菰蒲刺水青翠萍開處鑑波明  
画船轉過乘

楊外水面風來聞樂聲

題黃華幽居圖

層層佛屋貼山腰山下幽居勝午橋  
物外人家無稅役關中生理足漁樵  
雁踰遠障凌虛迴人與高秋共窳寡  
何處人間景如此便應歸隱不須招

長安行

長安道無人行黃塵不起生榛荆  
高山有峰不復險大河有浪亦已平  
向來百二秦之形祇今百二

秦之名我聞人固物乃固人不爲力物乃傾將軍  
誓守不誓戰戰士避死不避生殺人飽獸敵自去  
長安有道誰當行黃塵漫漫愁殺人但見蔽野雞  
群鳴河東游子淚如雨眼花落日迷秦城長安道  
無人行長安城中若爲情

別春辭

東皇按轡來何遲人間二月才芳菲六十日春能  
幾時不如意事常相隨一聲啼鳩花片飛把酒却

與春別離春緩歸聽我歌滔滔歲月如流波貴憂  
孰與賤樂多吾寧不欲列華鼎馳鳴珂香屏倚妓  
薦綺羅人生賦分有定在誰能買愁費天和長安  
市上酒如海跨驢徑上胭脂坡酒酣醉舞雙婆娑  
春自來去如予何

秋風怨

疎星耿耿明天河夜涼翠幕生微波碧梧委葉傳  
金井一夕秋風將奈何春風令人和秋風感人悲



妾愁自與秋風期秋風爭管人別離燈灺垂紅粉  
泥暗龜甲屏風雲影亂絡緯弔月啼不斷蓮漏墜  
荷夜未半涼颼蕭蕭入疎竹枕底寒聲碎瓊玉敲  
愁撼睡睡不明花露盈盈泣魚日秋風且莫吹念  
妾守空閨嫁狗隨走雞隨飛九死莫作蕩子妻郎  
薄倖妾薄命花自無言絮無定碧雲算合郎未歸  
幾度粧成掩明鏡

河上之役三韻

河堤一決豈天窮失在當年固白公誰與麻岡開  
故道暫教版籍見山東

又

新築河堤要榮勳萬人採淨土壩薪青青好借曹  
州柳舊是中原一段春

曹臨沒已久

又

萬夫卷土障橫流負土成山水未收明日落成真  
盛事誰能作賦擬黃樓

圍城

碧樹蒼烟起暮雲長安陌上斷行人百年王氣餘  
 飛觀萬里神州隔戰塵身與孤雲向雙闌愁隨落  
 日到咸秦山河大地分明在莫為時危苦愴神

驟雨

龍戰雲塵擁日囚鞭驅雷電走蛟虬望中雨脚橫  
 天落觸處湍聲卷地流梁苑樓臺失炎暑漢家城  
 關動高秋若為借得天粟去倒瀉明河淨九州

資聖閣登眺同麻杜諸人賦

高閣凌雲眼界寬野烟碧樹有無間天邊孤鳥飛  
 不盡陌上行人殊未還魏國幾回時事改休堤千  
 古夕陽閒愁來重倚闌干望崧少西頭是故山

○南冠五人

南冠五人  
 司馬侍郎朴 一首

朴字文季溫公之猶子宋兵部侍郎以奉  
 使見留居于祁陽授以官託疾不拜遨遊

王公之門以壽終文季工書翰有晉人筆  
意興陵萬機之暇嘗購其遺墨學之有雪  
霽同韓公度登圓福寺閣和李劬之詩今  
畧載于此積雪日出杲雪飛梅已殘朋游  
要及時閣鄰有遐觀乘此蕪穢平快覽天  
宇寬霽色混銀界曠望連江千山如白毫  
相滉溢清揚端一氣轉浩渺萬里皆瀾漫  
優哉賦梁苑想像排廣寒此下不可讀當

俟善本考之

無餘居士齋壁有沈傳師游道山岳麓詩石  
刻穆仲等和之因亦次韻

湘西勝景豈易論群山騰闖萬馬奔鶴泉一麓騫  
鵬嚼松風十里歲祇園當時侍却偶題寫筆力孰  
敢爭雄尊東京少年妙詞藻南陽舊族齊陰樊天  
心月脇出奇語使我展讀忘朝昏差差戈劍隱一  
敵落落旗鼓嚴千屯無餘居士厲幽志細研六藝

方專門凍餒嬌兒慣腸覓啼飢瘦婦餘淚痕惟君  
德義允相愜每窮道妙角與根他人勸酒驚逐魂  
二子頻酌勤空樽醉中詩成渺江海風外幡影徒  
飛翻卷藏篋笥已戢戢風生襟袖何軒軒嗟乎我  
亦有餘腐陋哉羊政囚華元

滕奉使茂實 八首

茂實字秀穎姑蘇人初名裸徽宗改賜焉  
以太學正兼明堂司令與樞密路允迪翰

林脩撰宋彥通奉使割三鎮太原尋奉密  
詔據城不下國相怒囚使人於雲中欽宗  
北遷秀穎謁見涕泣請從行主者不之許  
放允迪彥通南歸茂實留雁門與兄宗正  
丞福 字伯壽 淮南發運使倚共居久之家人  
至自汴梁秀穎往來并代之間布衣終身  
臨終令黃幡裹尸而葬仍大刺九字云宋  
使者東陽滕茂實墓士大夫哀其忠爲之

起墳於雁門歲時致祭好問兒時先大夫  
教誦秀穎臨終詩然亦僅能記末章數語  
而已庚子春自山東還鄉里值鄉先生雁  
門李鍾秀挺求秀穎詩文鍾秀云喪亂以  
來家所藏書焚蕩都盡避兵山中民家偶  
於破箱中得秀穎詩一編紙已敗爛前序  
秀穎自作可辨者百餘字大畧言能安於  
死生之分而不能忘感槩不平之氣又曰

蘇屬國牧羊海上而五言之作自此始予  
敢援以爲例後叙是筆吏林泉野老彥古

彥古不  
著姓

年七十八手錄三滕始末號東陽

滕秀穎鳳山思遠記者詩數百首可讀者  
什六七臨終一詩缺三五字而已非筆吏  
此集則秀穎之事無以見於世予意先生  
名節凜然不媿古人其文字言語宜有神  
物護持雖埋沒之久而光明發見決有不

可掩焉者因備述于此亦使彥古之名託  
之而不腐云

荷字恐悞當作禱  
見南申高濟叔碑

哀隆德守臣張確確浮休張舜民之弟嘗為  
烏延帥幕獨不廷謁童貫作詩弔之

睢陽萬古一張巡忠義傳家有世臣顏子伏膺當  
入室潘郎望拜肯同塵圍城已陷天猶晦仗劍臨  
危氣益振餘子鄰邦盡曹李倫生端作九泉人

天寧節有感

節臨重十慶天寧古殿焚香祝帝齡身在北方金  
佛刹眼看南極老人星千官花覆常陪燕萬里雲  
遙阻在廷松柏滿山聊獻壽小臣孤操亦青青

汴梁

故老云徽宗本以五月五日生以俗忌  
移之十月十日故此詩有重十之句

雨後蔬盤可喜偶成

過雨盤蔬日日新從今休歎庖郎貧寒藿安取咄  
嗟辦火食不憂生死隣野苴何施雖可鄙美芹欲  
獻去無回干戈萬里風塵晦慙媿平生肉食人

五日

節物驚心動遠思  
薰風又見浴蘭時  
空尋好句書紈扇  
無復佳人繫綵絲  
酒注菖蒲唯欲醉  
筒包菰黍不勝悲  
明年此日當何處  
風裏孤蓬自不知

喜雨

早暝雨霑渥豐穰  
都不疑商羊應屢舞  
布穀強多知龍見  
寧非數雲行自有時  
當年班夏令曾得近  
丹墀

偶成

纖雲卷盡見秋容  
古木交陰一掃空  
雪壓群山曉來雨  
葉侵缺甃幾番風  
欲歸未得人將老  
屢送還來鬼亦窮  
賴得子卿佳傳在  
整冠時讀慰飄蓬

立春

東皇布政物皆春  
山色禽聲便可人  
滿谷和風消積雪  
半窗晴日動游塵  
宮花插帽枝枝秀  
菜甲堆槃種種新  
拘窘經時成土俗  
聊從一醉適天真

臨終詩并序

某奉使亡狀不復反父母之邦猶當請從  
主行以全臣節或怒而與之死幸以所仗  
節幡裹其尸及有篆字九爲刊之石埋於  
臺山寺下不必封樹蓋昔年大病夢遊清  
涼境界覺而失病所在恐于此有緣如死  
窮微則乞骸骨歸悉如前禱預作哀詞幾  
于不達方之淵明則不可亦庶幾少游之

遺風也

蓬鹽老書生謬列王都官索米了無補從事敢辭  
難殊隣復盟好仗節來榆關城守久不下川塗望  
湯湯儉輩果不惜一往何當還牧羊困蘇武假道  
拘張騫流離念窘束坐閱四序遷同來悉言歸我  
獨留塞垣形影自相弔國破家亦殘呼天竟不聞  
痛甚傷肺肝相逢老兄弟悼歎安得驩波瀾卷大  
厦一木難求安就不違我心渠不汗我顏昔燕破



齊王群臣望風奔王蠋猶守節燕人有甘言經首  
自絕脰感槩今昔聞未嘗食齊祿徒以世爲民况  
我祿數世一死何足論遠或死江海近或死朝昏  
歛我不須衣裹尸以黃幡題作宗臣墓篆字當深  
刊我室尚少艾兒女皆童頑四海無置錐瓢流倍  
悲酸誰當給衣食使不厄飢寒歲時一酹我猶足  
慰我冤我冤亦悠悠異鄉寄沉寃他時風雨夜草  
木彌空山

通理何先生宏中

一首

宏中字定遠先世居雁門叔祖青出武弁  
任忻州兵馬使回家焉祖行宣西遊遇仙  
不返行宣之子子奇子霖政和中中武舉  
高科子奇秉義郎武州宣寧尉子霖忠翊  
郎守豐州安豐砦皆沒王事定遠子奇子  
也幼倜儻儀觀秀整雅以奇節自許宣和  
末方賊擾江浙定遠以太學武舉進士陳

破賊三策徽宗褒諭謂非近日言事者所  
可比已而破賊如定遠策遂知名宣和元  
年集英殿試策中第二調滑州韋城尉汴  
京被圍州郡多避走獨韋不下兵退統制  
武漢英奏辟欽宗御札召赴軍前以路塞  
不果因請兵真定宣撫司時副帥种師中  
兵已潰宣撫司檄定遠副漢英守銀冶路  
既而太原破西路無完城定遠等提兵竝

山而東將赴援京師俄漢英戰死定遠收  
合散亡立山棚七十四所號令所及千里  
而遠艱食數月人不敢相食詔以爲武節  
大夫河東河北兩路統制接應使是後國  
朝兵日盛所守唯銀冶一城而已帥府募  
人生致定遠天會五年二月糧盡被擒大  
帥昭刺憐其忠解縛授以官定遠投牒于  
地曰我常以此物誘人出死力若輩乃欲

以此嚇我耶帥嘉其不降屈又問欲還鄉  
否定遠謀南奔陽以願婦為言會監送使  
臣有先與定遠相攻劫者愬之囚西京府  
君廟二年帥一日召之授以官又不拜使  
之克軍亦不從取家屬填城黃龍府益偃  
蹇不行帥怒褫衣欲斬之定遠忻然就戮  
曰得死所矣擁之行已數十步帥終不忍  
召還問爾授官不願克軍又不行填城又

不行斬又不懼畢竟欲如何定遠徐曰生  
死在公奚問為帥怒解繫之西京獄得州  
人保任者數十族乃放歸請為黃冠時神  
霄宮廢道士舊以徽宗為東華君將毀其  
像定遠為起紫微殿遷像事之年六十三  
正隆四年病歿自號通理先生所著成真  
通理二集藏于家州將傅慎微幾先贈詩  
云故人何定遠造物不虛生骨骼稜稜瘦

詩篇字字清世皆尊道義我獨見忠誠尊  
酒分攜後何時蓋復傾其餘與朱少章輩  
唱酬甚多皆爲所推重載之墓碣之陰

述懷

馬革盛尸每恨遲西山餓踣更何辭姓名不到中  
興曆付與皇天后土知

醉軒姚先生孝錫

三十五首

孝錫字仲純豐縣人政和四年登科調代

州兵曹國朝兵入雁門州將議以城降官  
屬恇怯投死無所仲純投床大斲畧不以  
爲意帥府就注五臺簿未幾移疾去回家  
五臺善治生亭榭場圃富於遊觀賓客日  
盈其門州境歲饑出家所藏粟萬石賑貧  
乏多所全濟鄉人德之中年之後以家事  
付諸子故浪山水間詩酒自娛醉軒其自  
號也資稟簡重喜怒不形于色棄官時年

二十九至八十三乃終名士大夫爲詩以  
甲者數十人先生長于尺牘所著雞肋集  
喪亂以來止存律詩五卷而已今畧載於  
此次冠卿韻云節物後先南北異人情冷  
暖古今同次趙獻之韻云紅纈退風花著  
子綠鍼浮水稻抽秧溪墅早春云久客友  
情諳冷暖衰年病骨識陰晴春日和德充  
云烟染綠絲迷別浦雨催紅糝綴長條新

詩云愁邊日晷偏疑短夢裏江鄉未當歸  
盤無兼味慙留客夢獸多岐不到鄉賦雪  
云酒敵餘威翻索莫詩含幽思倍清新雨  
云岸漲魚吹沫山空石轉雷雪云雥風初  
學絮帶雨不成花峯山寺云谷虛繁地籟  
境寂散天香雲生古木千章秀山抱晴川  
一掌平懷士會云詩忙疎酒醜俸薄成厨  
煙感懷云玄晏算年常抱病子山終日苦

息婦古詩尤有高趣恨不復見之矣

挽詞今載

于此掌欽令胥持國云山東夫子老河東  
 誰與先生臭味同早歲遽辭名宦裏百年  
 常樂聖賢中醉軒風月千秋恨蝸室樽壘  
 一夢空白玉樓成人不見空餘鄉淚託東  
 風 司經劉迎云百年陸陸變蒼茫晚向  
 山林得老蒼孤幹鬱生陳柏樹故基豈立  
 魯靈光謀生有道田園樂閱世無心壽命  
 長何日車聲過通德拜公一炷影前香  
 高平李仲畧云早歲才猷著崎嶇步世艱  
 非嫌食周粟甘學抱吳關高義追東漢移  
 文謝北山孤風激貪懦凜凜莫容攀 平  
 水毛麾云蓋世清芬五十年直疑湖海水  
 雲仙不矜江夏無雙譽便造南華第一篇  
 松菊就荒堪笑晚尊鱸託興果誰賢佳城

鬱鬱高名在應與臺山萬古傳 西京都

轉運使丹元子田彥臯云琳琅風月三十

首游戲塵凡八十秋三徑尚存元亮菊五

湖空負子皮舟 王元老云夫子人之傑

魁然道最純鄉閭連沛邑族系出虞賓清

節冰壺瑩孤標玉樹新妙齡探桂窟雅志

傲蒲輪事業傳衣鉢風流表縉紳斗南惟

此老月旦復誰人忍死笑亡社偷多笑具

臣斯文雖未喪吾道竟難伸彭澤不書宋

東陵無負秦直從強健日收得自由身把

臂言猶在回頭迹已陳發書占賈鵬絕筆

感商麟去矣騎箕尾嗟哉厄已辰終天從

此別窮壤向誰親隨椁逢王果留燈待沈

彬彭殤似逝水丘趾共荒榛書帶緣新壠

笛聲起舊鄰絕絃雙鬢淚挂劍一傷神冢

樹悲長夜山花作好春龜趺平木杪誰為

寫光塵 承旨常世傑云望西山以馳乎  
 予其下維德人抱明月以螭盤予寧終屈  
 而不伸三昏廓以四關予群飛紛其上翥  
 將搏拏以竝征予惜衝風之落羽蘭為佩  
 予桂為惟誰招余者予余從與婦青雲豈  
 難振跡予願捷結之不素玄豹自媚其文  
 予亦何嫌於隱霧詩書與友予琴尊與游  
 適意自安予樂聞自休出吾餘以研桑予  
 猶足以比素封之侯惟清閒為祕留予非  
 有力能兼取雖神仙猶可畏予曾莫樂于  
 下土數與數相乘除予常此奪而彼與陋  
 巖栖之下槩予心實往而跡藏出非微而  
 處非隱予吾獨蹈古人之所常隨  
 時委順以終老予噫先生為不亡

睡起

生涯甘分寄畊桑山色圍門水遶墻困病久懲耽  
 酒癖愛關猶有和詩忙簷冰滴砌春猶冷野馬浮  
 川日漸長舊事老年多記憶故園歸夢正悠颺

柳溪別墅

安車隨意飽甘肥晚食徐行理亦齊山市日高人  
 未集柴門客至鳥先啼溪橋散望攜筇度野寺牽  
 吟信筆題容膝易安聊自適甕天閒看舞醯雞

歲晚懷二弟

少易成歡老易傷壯遊垂白未還鄉  
煙塵無復音書到寃夢猶疲  
道路長爆竹又驚新薦歲屠蘇空  
憶舊傳觴年年此日遙相憶  
鴻雁何時續斷行

睡起

睡起日侵牖開軒遙見山曉風吹臘  
盡芳草惹春還煙暖鶯遷谷雲低雁  
渡關衰年人事減遇酒得

開顏

次李平子登臺有感韻

落日孤雲帶遠岡戍樓烟瘴舊邊場  
疲民卒歲方懷土遠客憑高自憶鄉  
漢使一朝延四皓秦詩千古弔三良  
行藏此意無人解聊借青山送酒觴

九日題峰山

不須歌吹上叢臺千里晴川入座來  
世事難憑休挂口生涯見在且銜盃  
無情逐暖花先老有信迎寒雁已迴  
遙想故園親種菊霜枝露蘂向誰開

次韻王無競見寄



客懷重倚仲宣樓白草黃雲塞上秋山色不隨塵  
世改水聲還抱故城流隙中畏景那堪玩鏡裏衰  
顏祗自羞多愧詩人苦相憶遠傳佳句弔清愁

關居

無客訪衰殘柴門盡日關耽書真是癖惜酒近成  
慳苔徑行搜句茅檐卧看山却嫌明鏡裏偏照鬢

毛斑

和成冠卿見寄

別恨頻添鬢雪深百年懷抱鬱沈沈標名不挂金  
銀榜涉世空堅鐵石心俗物何勞供一醉殘僧正  
欲伴孤吟未絃三弄虛簷窸窣唯有清風是賞音

次韻秋興

老畏年光速愁添旅夢多西風著梧竹歸思入煙  
波夜永憑詩遣顏衰得酒和改溪千樹柳誰復曬  
漁蓑

感白髮

彈缺憑誰聽客歌震雷那復化魚梭梳頭白雪驚  
新有障眼玄花比舊多鄉問阻兵猶斷絕羈懷憑  
酒暫消磨不須更問今朝客門外元無雀可羅

晚霽

一夜雲峯卷迅雷殘紅狼藉點蒼苔鷺聲豈解留  
春住燕語虛勞喚夢迴愁寂頓疑詩思減衰殘偏  
感歲華催柳溪魚鳥應相識乘興無嫌日日来

重九偶成

天邊今日又重陽隴樹紅飛雁信霜且插茱萸慰  
衰鬢莫將詩句撓迴腸歌勤皓齒人俱醉舞戀晴  
暉蝶也忙來日預期扶宿酒未應籬菊減秋香

溪橋早春

輕黃未染柳梢勻連日溪風卷塞塵乍暖乍寒花  
信晚相呼相應鳥聲頻少勤設扶經綸榮老懶空  
餘病患身追憶故園桃李樹年年紅紫爲誰新

東軒琴示兒子沂

古人無復見但有東軒琴一鼓高山操  
目窺古人心正聲久沈埋但耳喧哇淫  
正可自怡悅不須求賞音

花前獨酌二絕句

老將花酒作知音起就花前酒自斟  
莫便與米先醕酌却妨真賞廢搜吟

又

移得名花手自栽花知不爲老人開  
興來誰是尊

前客唯有提壺送酒盃

題柳溪別墅

雨霽風和不動塵柳邊攜酒賞晴春  
頻來溪鳥渾相識渡水穿花不避人

芍藥

綠萼披風瘦紅苞浥露肥  
只愁春夢斷化作彩雲飛

次韻李相公偶成

簾鳥喚歸夢竹風追夕涼感時空有淚却老分無  
方流水依山白孤雲帶日黃無人共尊酒散髮卧  
藜床

村居偶成

靜愛柴門野興幽杖藜徐步到岩丘深林不獸鳥  
先噪廢圃無人泉自流土瘠稅租隨力辦年豐禾  
黍過時收客來不慮無供給白酒黃雞亦易求

用峯山舊韻二韻

信步西風寺窮幽未覺賒松根纏石瘦雲磴出岩  
斜思爽餘三唱詩成自一家空餘幾兩屐不踏渡  
溪槎

又

春水上堤沙春晴散望賒衰年花近眼夕客夢還  
家暝日孤鴻沒迎風雙燕斜平生江海意早晚送  
浮槎

題佛光寺

臧穀雖殊竟兩亡倚闌終日念行藏已忻境寂洗  
塵慮更覺心清聞妙香孤鳥帶煙來遠樹斷雲收  
雨下斜陽人間未卜蝸牛舍遠目橫秋益自傷

芭蕉

鳳翅搖寒碧虛庭暑不侵何因有恨事常把未舒  
心

蜀葵

傾心知向日布葉解承陰空側黃金盞誰人與對

斟

次韻公才對菊見懷

髮蓬新感二毛侵尚阻清尊對菊斟久擬芝蘭同  
臭味莫疑魚鳥自高深食貧豈復甘秦炙客病空  
懷奏楚音挂席無由上牛斗漫憑流水送歸心

寄田朝散善輔

粉署標名舊山成識面新青雲摧勁翮空谷滯幽  
人世路謀身拙心田育德醇久要知可卜傾蓋已

情親

春日書懷

雲散交情薄，棊翻世態新。  
山容猶帶臘，鳥語已回春。  
節物驚心遽，丘園入夢頻。  
東風如解語，端笑未歸人。

春日溪橋

留戀春光慰病顏，無情風雨卷春還。  
陰陰密綠籠溪暗，細細疎紅點徑斑。  
老去益憐詩思澀，懽來聊

破酒腸慳不嫌門外無車轍，得遂衰慵一味閒。

登樓有懷

老愧凭闌目力昏，百年懷抱向誰論。  
晴空雁起雲邊塞，夕照人歸郭外村。  
因記昔遊驚迅晷，乍將離恨付清尊。  
誰人肯似邊居士，遠駕朱輪過雀門。

題滕奉使祠

本期蘇鄭共揚旻，不意芝蘭失後凋。  
遺老祗今猶涕泪，後生無復識風標。  
西陲雁度霜前塞，滹水樵

爭日暮橋迨想生平英偉魄凌雲一笑豈能招

朱奉使弁

三十九首

弁字少章宋吉州團練使天會六年以通  
問見留命以官託目疾回辭粹然以錐刺  
之而不爲舜用是得歸凡居雲翔二十年  
自號觀如居士有曲隋風月堂詩話行於  
世紹興十二年皇子生大赦宋使洪皓張

邵朱弁南婦

蘇子翼送黃精酒

仙經何物堪却老較功無如太陽草龍銜雞銜名  
雖異菟公羊公事可考蘇君真是神仙裔橘井陰  
功貫穹昊雲笈書成數萬言銀闕珠宮用心早獨  
知此物有竒効福地名山爲儲寶不憚林泉新劄  
掘斥去杵臼謝篩擣況從高士論麩糜更課公田  
收秫稻一朝靈液浮瓮盎三冬浩氣生襟抱且欣  
軟飽得澆腸漫說逆流工補腦眼碧那憂散黑花

四十六  
髮白故應還翠葆賈傅只嫌松醪陋劉隋敢誇桑  
落好直須五斗論解醒寧待三杯乃通道誰知萬  
里落旄人亦許苑尊自傾倒為君喚迴雪窖春八  
載羈愁供一掃曼倩宜分此日桃安期莫詫他年  
棗何煩更採石斛花已覺容顏不枯槁根連石室  
喜入夢句擬桐溪媿摘藻平生我亦愛書札朱髓  
綠腸勤探討幸君汲引成此志鶴駕駸駸望仙島  
吞腥啄腐非夙心歲晚茲言良可保

初春以蔓菁作齏因憶往年避難大隗山采  
蘋澗中為齏齏成汁為粉紅色而香美特異  
乃信鄭人所言為不誣矣今食新齏因成長

韻

歲蔬飽三冬媚盤無糝糜陳齏解束縛冰雹散刀  
几春畦蕪菁苗入眼漸可喜青黃含風露採摘從  
此始持帚作新齏一飽競鮮美芬香溢肺肝甘脆  
響牙齒捫腹幽窳下芻豢詎能比憶昔避難初竄



身重巖裏雲煙昏具茨老稚且棲止燕兵大搜索  
焚蕩石牛底脫命獨虎山野笑紛四起暮投山前  
店茅棟例燒毀潛伏窟室中不敝不蓋體妻孥坐  
相對生意薄於紙晨朝行澗中采芹澗邊洗鄭人  
誇此齏他菜非所堪氤氳投瓦盞觸鼻似蘭芷一  
杯紅粉羹析醒勝仙醴乃知野人獻涼薄未宜鄙  
今來滯殊鄉白首家萬里猶能對葷羶咀嚼出宮  
徵回思十年夢爭奪殊未已飽食但謀身吾穎良

有此

北人以松皮爲菜予初不知味虞侍郎分餉  
松皮把團飯素授厨人與園蔬雜進珍美可

喜因作一詩

吾老似出家晚悟媿根鈍滋旨却羶葷禪悅要親  
近偉哉十八公茲道亦精進台身奉刀几割體絕  
嗔恨鱗皴老龍皮鳴齒溢芳潤流膏爲伏龜千歲  
未須問便堪奴筭蕨詎肯友芝菌跣趺得一飽萬

事皆可擯侍郎文懿後落落衆推俊澹然世味薄  
內典得所信香厨留淨供頻食不言頓晏然默不  
語草木雷音震得法於此公骨髓傳心印應憐持  
節人餉此爲問訊欲將無上味爲我洗塵至食之  
不敢餘感激在方寸

予以年事漸高氣海不能熟生暖冷旅中又  
無藥物遂用火攻之策灼艾凡二百壯吟呻

之際得詩二十韻

不作漳濱卧年侵血氣衰據鞍思少壯攬鏡歎清  
羸有病方求艾無營莫問著心知出下榮理勝遇  
中醫陽燧神逾速銅仙術盡施論功鄙炮製取穴  
辨毫釐火帝恩光異炎官績用奇書螢比信似珠  
蟻迫方知忖物嗟炮鼈觀形笑灼龜燼微初炙手  
氣烈漸鑽皮閉目書徒長支頭枕屢移發狂還自  
哂賈勇僅能支不鷓追風日吳牛喘月時忠言勞  
緩頰善謹爲開眉服氣工夫遠燒丹歲月遲衛生

防後患伐性釋前疑展轉那成夢呻吟且當詩曰  
心念民瘼出位歎身卑欲已七年病當從百世師  
保身將保國未可廢箴規

元夕有感

朔雪餘千里東風徧九州關河中土異燈火上元  
愁綠蟻嘗新釀青貂戀故裘紫姑無用卜世事正  
悠悠

憶鍾離濬

浚都同聚讀書螢楚岸春風憶送行三十年前初  
識面四千里外更關情出疆我亦徒勞爾入仕君  
今何似生旅雁相逢須一問要從郵上得新聲

炕寢三十韻

風土南北殊習尚非一躅出疆雖仗節入國暫同  
俗淹留歲再殘朔雪滿峯谷染冬貂裘敝一炕且  
跼伏西山石爲薪黝色驚射目方熾絕可邇將盡  
還自續飛飛湧玄雲燄燄積紅玉稍疑雷出地又

似風薄木誰容鼠棲冰信是龍銜燭陽曦助喘息  
未害搖空腹惠氣生袴襦仍工展拳足豈惟脫膚  
鱗兼復平體粟負暄那用詫執熱定思沃收功在  
歲寒較德比時燠雖餘炙手焰寧有爛額酷矧嘗  
凝亘晨炎帝獨回斲玄冥真退聽祝融端可錄嗟  
予亦何者萬里歌黃鵠偃仰對麗扉妍暖謝衾褥  
壯懷羞竈媚晚悟笑突曲因思隋指人暴露苦鞍  
瘃頻年未解甲蹈此鋒刃毒遙知革輅中盱食安

豆粥陪臣將命來意懇誠亦篤存竒不能吐何術  
止南牧君心想更切臣罪何由贖此身雖自溫此  
志轉煩促論武貴止戈天必從人欲安得四海春  
永作蒼生福聊擬少陵翁秋風賦茅屋

秋泉次韻

新醅滃滃溢瓶盆漱石秋泉帶雨渾翡翠杯深雲  
液凝鷓鷁杓滿月波翻照人光入尊壘瑩流齒香  
隨語笑噴已拚扶頭日三丈朝醒未解任昏昏

夜雨枕上

淅淅風聲止淒淒雨氣涼  
愁工縈客思夢故遠江  
鄉書疏親朋少干戈歲月長  
羣城拜節地可復見  
秋霜

客懷

兵氣常時見客懷何日開  
形骸病自瘦鬢髮老相  
催已負秦庭哭終期漢節回  
風雷識我意一雨洗  
氛埃

歲序

歲序忽將晏節旄嗟未還  
低雲慘眾木寒雨失群  
山喪亂關詩思謳謠發  
病顏夢竟識舊隱時到碧  
溪灣

白髮

白髮使車前煙波思渺然  
霜清穫稻日風急授衣  
天客館但愁坐釣舟誰  
醉眠乘槎會有便真到斗  
牛邊

有感

容貌與年改鬢毛隨意斑雁邊雲度塞鳥外日銜  
山仗節功奚在捐軀志未關不知垂老眼何日觀  
龍顏

劉善長出示李伯時画馬圖

俯首舉尾拳一蹄掣韁欲嗅驕不嘶奚官背肩兩  
足垂意貌自與造父齊雞目麟鬣鳳皇臆玉山禾  
遠未容食籜雲追電有餘地置之画圖人豈識精

神權奇孰可班當在白兔青龍間君知此馬從何  
來龍眠胸中十二閑

謝崔致君餉天花

三年北饌飽羶葷佳蔬頗憶南州味地菜方爲九  
夏玳天花忽從五臺至崔侯胸中散千卷金甌石  
相傳雲裔愛山亦如謝康樂得此攜婦豈容易應  
憐使館久寂寥分餉明明見深意堆盤初見瑤草  
瘦鳴齒稍覺瓊枝脆樹雞濕爛慚扣門桑蛾青黃

漫趨市赤城菌子立萬釘今日回君不知貴乖龍  
耳僅免一割沙門業已通三世偃戈息民未有術  
雖復加餐祇增媿雲山云此縱不遠口腹何容更  
相累報君此詩永爲好捧腹一笑萬事置

戰伐

戰伐何年定悲愁是處同黃雲紫晚塞白露下秋  
空魚躍溪波月烏啼落葉風誰知渡江夢一夜繞  
行宮

龍福寺煮東坡羹戲作

山寺解塵鞅溪邊有微行手摘諸葛菜自煮東坡  
羹雖無錦繡腸亦飽風露清鈎簾坐捫腹落日千

峰明

丙申中秋不見月

中秋萬里月何處駕冰輪底事隔年會不憐今夕  
人兔疑停杵臼器豈避風塵默識嫦娥意承平賞  
更新

十七夜對月

病骨怯風露愁懷賦甲兵人居絕域久月向此宵  
明輪仄初經漢光分半隱城近遲不肯下應識異  
鄉情人謂少章此詩似微升古塞外而未章尤為淒絕必有能辨之者

睡軒為趙光道作

溪炷爐香睡息勻蕭然一覺得天真生涯聊示入  
閻世緣境都忘藥裹身窺牖屢來從汝喚叩門空  
去任渠與更須滿壁圖雲水卧想江湖渺莽春

南齋即事

頻年行役夢庭闈陟岵常嗟脚力疲每訴酒巡嫌  
客惡力營官事笑兒癡雲山幸不持錢買花竹何  
妨帶雨移此味貴人元未識恐緣詩好被渠知

餞和父之并州

有北何堪說如南未是帝并州子徑往漢節我方  
轆筆硯論心久干戈會面稀新程相憶處路入嶺  
雲微



獨坐

草凍慵抽碧桃癡懶暈紅黃雲猶漢野紫塞湯秦  
風使節空留滯侯王未曾同垢除雪不掃獨立數  
歸鴻

寒食

絕域年華久衰顏淚點新每逢寒食節頻夢故鄉  
春草綠唯供恨花紅只笑人南轅定何日無地不  
風塵

上巳

行行春向暮猶未見花枝晦朔中原隔風煙上巳  
疑常令漢節在莫作楚囚悲早晚鸞旗發吾歸敢  
恨遲

送春

風煙節物眼中稀三月人猶戀  
片段喚回鄉夢雨霏微小桃山下花初見弱柳沙  
頭絮未飛把酒送春無別語羨君纔到便成歸

天問絕句

穴邊酣戰君臣蟻波上群嬉婢妾魚苦樂不同同  
一字問天此理竟何如

客夜

城月四更上隴風一室幽織雲縈雁塞重霧逼貂  
裘兵革何年息乾坤此夜愁殊鄉兩行淚騷屑洒  
清秋

攄抱

客滯殊方以山圍絕塞深秋風入橫笛夜月倚沾  
襟造膝他時語捐軀此日心飛霜滿明鏡髮短不  
勝簪

重九

九日今何地寒溪紫塞霜敢嫌蘆酒濁且對菊花  
嘗歲月雙蓬鬢乾坤百戰場勛黃知未舉夢自識  
鴛行

次韻劉太師苦吟之什

長城五字屹逶迤可笑偏師敢出奇句補推敲未  
安處韻更疾絮益難時癡迷竟作禽填海辛苦真  
成蟻度絲却羨彌明攻具速劉隗漫說也能詩

善長命作歲除日立春

土牛已著勸農鞭葦索仍專捕鬼權且喜春盤兼  
守歲莫嗟臘酒易經年東風漸入江梅夢朔雪猶  
迷塞柳天元會明朝定何處羈臣揮淚節旄前

次韻子文秋興

逸興常時有逢秋一倍多山長含楚雨天遠接吳  
波尋壑同元亮浮家伴志和釣竿行人手還著向  
來蓑

冬雨

冬雨不成雪北風寒未淡山藏千疊秀雲結四垂  
陰迥洒凌朝閣殘聲入夜衾端能洗兵甲足慰此  
時心

寒食感懷次韻吳英叔

疾風甚雨老難禁嶺外無錫誰解吟雙鬢客塵諳  
世變兩眉鄉思儘愁侵榆錢何處迎新火杏粥頻  
年繫此心落日高城竟易斷天臨牛斗五湖深  
關河迢遞繞黃沙慘慘陰風塞柳斜花帶露寒無  
戲蝶草連雲暗有歲鴉詩窮莫寫愁如海酒薄難  
將夢到家絕域東風竟何事祇應催我鬢邊華

寒食

清明六到客愁邊雙鬢星星只自憐兵氣尚纏巢  
鳳閣節旄已落牧羊天紙錢灰入松楸夢錫粥香  
隨榆柳烟北向雁來寒霧隔音書不比上林傳

李任道編錄濟陽公文章與僕鄙製合爲一  
集且以雲館二星名之僕何人也乃使與公  
抗衡獨不慮公是泚者紛紛於異日乎因作  
詩題於集後俾知吾心者不吾過也庚申六  
月丙辰江東朱弁書

絕域山川飽所經客蓬歲晚任飄零詞源未得窺  
 三峽使節何容比二星蘿葛施松慙弱質蒹葭倚  
 玉怪殊形齊名李杜吾安敢一載公言有汗青濟陽  
公謂宇文叔通叔通受官而少章以死自守取用  
 叔通見比故此詩以不取齊名自託至於書年為  
 庚申與稱江東朱弁  
 者蓋亦有深意云

秋夜

秋夜雖漸永未抵客愁長秋月雖已圓不照寸心  
 方將心貯此愁真作萬斛量為月憐此夜誰共干

里光空令還家夢欲趁征鴻翔

○附見

附見 蘧然子趙滋 一首

滋字濟甫本出馮翊其祖貞元間來為南  
 京漕司戶籍判官卒官下妻子不能歸遂  
 為汴人濟甫少日出闔閭間其曉音律善  
 談笑得之宣政故家遺俗者為多及長賦  
 於游蕩乃更折節取古人書讀之學書學

西學詩學論文立志既堅力到便有所得  
爲人強記默識不遺微隱唐以來名人詩  
文往往成誦如目前若論文義解析脉絡  
殆若夙昔在文字間者画入能品詩學亦  
有功如黃石廟等作今代秉筆者或亦未  
可輕議閒閒趙公書法爲今代第一手學  
者多做之但得其形似而已濟甫筆勢飛  
動頗得公不傳之妙宗室胙公文采風流

照映一時而濟甫以布衣從之游商畧法  
書名画胙公亦以真賞稱焉隆德太一故  
宮樓觀臺沼門戶道路花木水石悉能歷  
數之聽者曉然如親到其處至於宋名賢  
所<sub>居</sub>第宅坊曲與其家行輩群從孫息姻婭  
排比前後雖生長鄰里<sub>者</sub>不加詳也嘗過長  
清一禪寺與僧談僧言五派傳授圖人不  
易作濟甫笑曰易與耳因索筆作圖坐中

他日以舊本證之，不毫末差也。丁酉歲，歿於東平時年五十九。

### 黃石廟

狂豪擊車代無人，神石一砭志乃信。吹噓風雲遮楚秦，炎精熾然四百春。一編尚恪續後塵，江山有待終此身。望望久愁橫目民，朝陽淒淒霜未休。江燕竟來江北游，山回鼎移海橫流。天風何時清九州，草泥自古踰王侯。神棄不邱誰當羞，割牲醜酒

### 空千秋

先大夫詩

四十四首

鄉先生權叅知政事，代郡楊公叔玉誤先人墓銘。今畧載於此。先生姓元氏，字德明，秀容人。唐禮部侍郎次山之後，自幼讀書，世俗鄙事終其身，不挂口，爲人誠實樂易。洞見肺腑，雖童子以言欺之，亦以爲誠然也。先大夫歿，遺產無幾，先生布衣蔬食處

之自若家人不敢以生理累之僮奴有竊  
拾東家之棗者立命還之貧人負債則往  
往令折券以貧之也累舉不第放浪山水  
間未嘗一日不飲酒賦詩春秋四十有八  
終于家先生作詩不事彫飾清美圓熟無  
山林枯槁之氣居東山福田精舍首尾十  
五年東崑其自號也有集三卷藏于家銘  
曰貪夫徇財智士死名宇宙古今萬轍涇

并我機弗張我戶弗扃天宇泰然物莫敢  
櫻飲芳食菲岩岫杳冥玉佩瓊琚御風冷  
冷魯山之醇次山之清閱世幾傳猶有典  
刑邈哉先生明昌承安間科舉之學盛大  
夫士非賦不談人知先人有聲場屋間其  
以詩文爲業則不知也先人捐館後十年  
好問避兵南渡游道日廣世始知有元東  
岩之詩楊尚書之美云彼美元夫子學道



知觀瀾孔孟澤有餘曾顏膏未殘林觀察  
顯卿云文章變古名新體孝弟傳家守舊  
規雷內翰希顏云詩句妙九州孝友化一  
川王右司仲澤云讀書楓樹林曳杖白石  
灣至今文彩餘虎子仍斑斑李長源云衣  
冠巢許自高雅岩壑夔龍非棄捐餘人不  
能悉記家集亂離以來凡三失之今所存  
者特吾益之兄及門生輩所記憶者耳小

子不肖暗於事機不能高蹈遠引戀膠漆  
斗微倖萬一以取繫維之禍殘息奄奄朝  
夕待盡誠懼微言將絕謹以古律詩四十  
首附之中州集之癸冊庶幾來者知百餘  
年間作詩如先人而人或未之見其餘抱  
一槩之操泯泯然終老而無聞者豈勝  
計哉是又可慨嘆矣

桃源行

卷之十

汝州府志

山中三月山桃開紅霞爛熳無邊涯音崖山家藏春  
 藏不得落花流水人間來憶昔攜家竄岩谷素人  
 半向長城笑回頭塵土矢咸防繒弋徒勞羨鴻鵠  
 冬裘夏葛存大朴小國寡民皆樂俗晝永垣籬雞  
 犬閒春晴門巷桑榆綠漁郎偶到本無心仙境何  
 緣得重尋今日武陵圖上看唯見雲林溪復溪

送德溫同舍赴簾試

太常侍祠水蒼珮內相夜下金蓮燭皇家結網未

曾疎亦有佳人在空谷一從唐賦變遼律仰視折  
 楊猶雅曲雲臺勲業一青衫被髮操戈踵相屬筋  
 疲力涸僅乃得墨水一升凡幾辱英雄俛首入彀  
 中舉世悉然非子獨子家口眾親又老歲月旨甘  
 須寸祿薦書聞說過南宮冷暖人情到僮僕我初  
 與子偕計吏人後人前隨碌碌不慙齊客售鼓瑟  
 頗為荆人悲獻玉一詩今日送君行萬里秋風看  
 鴻鵠功名前路知不免雞黍後期良未卜錦標無

用唵龍頭帛書且當傳雁足

雨後

十日山中雨今朝見夕陽乾坤覺清曠草棘有輝  
光竹影搖殘滴松聲送晚涼南窗聊自適無用說

義皇

覽鏡

四十宜未老年年添鬢絲直教隨牒去也是桂冠  
時臺閣多新賦山林有逸詩悠然一尊酒滿酌不

須辭

室人生朝

新酒清渾共糟床洗盞嘗平時唯欲醉此日重難  
忘容服慙王霸山林得孟光白頭翁與媪萬事聽  
諸郎

太原古城惠明寺留秋望

西山萬古壯陪京一日汾流入廢城浩浩市聲爭  
曉集灼灼原隰但秋耕晉公老去詩仍在

晉公晉陽官舍

春日詩云白頭官  
舍裏今日又春風  
越石亡來恨未平  
千尺浮圖墓  
烟底瓦盆濁酒為誰傾

薄遊同郝漕子玉賦

全晉山河百戰場  
登臨歷歷見興亡  
夷居旄雜尤  
堪歎霸氣沈雄亦未量  
石瓮烟霞詩秀潤  
駘祠風月酒淋浪  
書生不是功名具  
慙媿山翁問葛強

山中秋夕

黃卷存餘習  
青燈共晚涼  
只知書味永  
不覺鬢絲

長老檜千年物  
幽蘭一國香  
平生陶靖節  
此夕邈相望

寄宗人彥達交城人

杯酒無緣接舊歡  
空將書尺問平安  
要君知我詩成處  
落日西風正倚欄

榴華

山茶赤黃桃絳白  
戎葵米囊不入格  
庭中忽見安石榴  
歎息花中有真色  
生紅一撮掌中看  
模寫雖

工更覺難詩到黃州隔千里畫家辛苦費鉛丹

過鳳凰山在雁門

鳳皇聞說似天壇  
去南來鳥上看想得松聲滿  
岩谷秋風無際海波寒

瓶形嶺早發在繁時界

海雲蕭瑟雪花乾  
人在羊腸百八盤  
關客不知名利苦見時應作画中看

寒食再遊福田寺

春山寂寂掩禪扉  
複嶺盤盤入翠微  
布鞵青鞵供  
勝踐粥魚齋鼓薦玄機  
日烘幽徑綠煙暖風定曉  
枝紅雨稀曾是西堂讀書客  
不應啼鳥也催歸

家園假山

八尺飛來峰蒼然  
立於獨細看甲乙字  
疑是平泉  
旗山非一草石見石山亦足便  
恐東岫雲來我  
簷下宿今朝鑿盆池  
明朝種松菊自笑住山人何時  
返巖谷

同侯子晉賦

沈沈江浦雲浩浩朔漠雪微生幾寒暑翅老飛歎  
折樓中見新過夕照送明滅欹枕數聲來疎窗耿  
殘月悲鳴或天性南北隨所愜誰念孤旅人年年  
爲愁絕

寒林圖爲侯子晉賦

川光茫茫風景算一雪無情天地素長安閉門千  
萬家亦有行人踏長路新豐煙火灞橋水画史上

作荒寒趣雪中故事知幾何偏識詩翁忍寒處君  
不見淮西城下鷺鸞鳴官軍夜斫吳家營只如党  
家麤俗亦不惡銀燭金荷天未明拈出雪詩三十  
韻寒驢席帽可憐生

雪詩三十  
韻見坡集

贈答彥文相過之什

程大原

剝啄誰叩門開門得吾友握手一大笑慰我離群  
公之子富才具事業可力取瞻望青松姿衰遲愧  
蒲柳金閨滿鴛鴦什伯自爲偶寂寞林野人過從

但鄰叟盤食無兼味  
筍蕨才適口窮達俱偶然  
相送且蠶酒

枕上

往時見白髮談笑輕歲月  
誰謂明鏡裏蕭蕭不勝  
鬪山林蹉跎久世慮初未絕  
觸物重興懷忽忽不自  
愜遭逢有奇耦才用隨巧拙  
如何杜陵叟自比  
稷與契茫茫拊塵編  
何時卒吾業

秋暮王氏園亭

細徑雲林底危亭澗水湄  
秋先殞黃葉寒未老紅  
葵嚼句幽禽答尋花晚蝶隨  
無人共幽興思與野

僧期

六言

北闕三臺五省東  
山萬壑千巖  
琴書中有真珠風  
月外無多談

山園梨葉有青紅初半者戲作一詩

霜輕霜重偶然中  
一葉雖殊萬葉同  
不信世間閑

草木解隨兒女作青紅

詩

少有吟詩癖吟來欲白頭科名不肯換家事幾曾  
憂含咀將誰語研摩若自讐百年開伎倆直到死

時休

尊酒

去灰論遠計木石笑浮生但有一尊酒何須千載

名

憶山中二絕句

東寺留連飲張園爛熳遊兒童望歸路一日幾登

樓

又

秋色山中好山翁醉不返不知籬下菊霜後幾禁

開

山中雨後

遶屋湍聲轉臨崖老樹推雷轟一雨去雲擘兩山



開

遣興

張翰一杯酒林逋千首詩性惟便自適材敢論時  
施狡兔從三窟鷓鴣分一枝青山有佳色只似往  
年時

發冀州留別恩禪師

詩拙非同社情親本故鄉共知成遠別且復暫相  
將池古蓮花淨窗深檜葉香何時重攜酒來宿贊

公房

貴公子詠

高堂紅燭鼓聲齊舞遍纖腰月未西一曲纏頭一  
雙錦驂騮空自惜障泥

蓮葉觀音恩禪師所藏同路宣叔賦

瑞相分明一葉中華嚴性海共圓通補陀自有丹  
青變画史區區可得工

謝張使君夢解餽春肉

牙豬肋厚一尺玉鹽花入煖蒸脫骨韭芽蓼甲春  
滿盤走送茅齋慰幽獨山人食貧才一粥幾被艾  
生嘲首着食前方丈非素懷頗憶懸貍繞高屋呼  
來鄰叟共一飽爲說使君方繼內飢民待哺今幾  
家無菜贖君慙此腹區區一肉見歌詠說食書生  
良未足却愁今夕夢寐間有物踏破園蔬綠

仙雞詩

并序

繁峙義興鎮酒家韓氏子畜一雞以善鬪

雄共鄉一日敵家以藥飼雞使不知痛求  
與韓雞對韓雞鬪久果被傷口下領不收  
垂死矣一賣藥道人過其門曰我能活此  
韓欣然使療之里中諸兒隨看者一二十  
輩皆使向壁立道人以雞置籠中探手良  
久若摩拊然者已而取瓢水啜之置瓢籠  
上即出門兒曹恠其久不還竊視之雞喙  
已復生矣道人布袍草冠腋下懸青囊落

魄嗜酒夜宿寺閣上韓氏子與里中人奔  
走求之并所卧草薦不在矣是時明昌七  
年仲規弟爲此鎮酒官予亦在焉作仙雞  
詩以記之

老雄健鬪夸擅場韓郎抱婦神色揚豈知黥兒出  
微倖毒手一發不得妨毳毛散灑尚可養利嘴一  
哆何由張青囊道人何許来自言救藥吾有方垂  
髯喫水濯殘血半喙隨手生新黃筠籠半開聞腦

膊草冠已往徒驚忙神仙世有寧虛荒惜哉詭激  
不可量世人鷲勇天且剗況於物也資強梁敷菜  
枯枿變金石未若與世鍼膏肓何須變化示狡獪  
知君辨作淮南王蓬萊東望雲茫茫愛而不見心  
爲狂刀圭不願換凡骨且欲共醉無何鄉

燈下讀林和靖詩

浴葉落復落清霜今幾番疎燈照茅屋山月入顏  
垣老愛寒花淡幽嫌宿鳥喧卷中林處士相對兩

忘言

觀西岩張永淳画雁

慘淡經營下筆難画成不似卷中看知君連夜江湖夢折葦蕭蕭沙水寒

從趙敷道覓石榴

仙人囊中五色露得種昔與蒲桃俱猩猩染花開五月已覺秋實懸庭除張園一酸齒欲裂君家兩株密不如竹馬兒童馱梨栗綠囊聊爲剝紅珠

雪行

五更驢背滿靴霜殘雪離離草樹荒身在景中無句寫錯教人比孟襄陽

龍眠画馬

驪黃求馬世皆然滅沒存亡自一天當日鹽車人不識只今空向画中傳

歲暮

蔌蔌霜力勁沈沈山氣冥北風半夜起吹動一天

星

送張冀州致政還都狀元行簡之又

一札恩書下紫宸東門祖道面園新路人也解賢  
疏傳河內猶思借寇恂父子文章千載事田園松  
菊自由身玉京才過梨花節靈沼行春莫厭頻宋用  
退傅張公閒遊靈沼探春回故事

春雪

幾日韶華雪更侵龍公試手本無心寒留整整斜

斜態暖入融融洩洩陰著柳直疑香絮重擁堦還  
似落花溪前頭桃李應無恙刺破相如買賦金

楸樹

道邊楸樹老龍形社酒澆未漸有靈只恐等閒風  
雨夜怒隨雷電上青冥

七夕

八河唯有鵲橋通萬劫歡緣一瞬中惆悵五更仙  
馭遠寂寞雲幄掩秋風

觀柘枝伎

脰鼓聲乾揭画梁綵雲擎出柘枝娘簾間飛燕時  
窺影鑑裏驚鸞易斷腸輕細不妨重暈錦迴旋還  
恐碎明璫杖頭白雨催花急拂散春風兩袖香

敏之兄詩

五首

敏之諱好古性識穎悟讀書能強記務為  
無所不窺年二十就科舉時先東麓君已  
捐館太夫人年在喜懼望其立門戶為甚

切及再上不中意殊不自聊又娶婦不諧  
日致惡語遂以狷介得疾嘗作望月詩有  
莫恠更深仍坐待密雲或有暫開時之句  
人或言詩境不開廣非佳語也歎曰吾得  
年不永境趣能開廣否未幾沒于北兵之  
禍年三十下

中秋無月

佳辰無物慰相思先賞空吟昨夜詩莫恠更深仍

坐待客雪或有暫開時

讀裕之弟詩嘗有翼聲柳巷溪之句漫題三

詩其後

阿翁醉語戲兒癡說著蟬詩也道竒吳下阿蒙非

向日新篇爭遣九泉知

又

鶯藏深樹只聞聲不著詩家画不成慙愧阿兄無

好語五言城下把降旌

又

傳家詩學在諸郎剖腹留書死敢忘先人臨終有剖腹留書之

語背上錦囊三箭在直須千古說穿楊

題江村風雨圖

渡下舟橫水拍空墨雲隕雨樹號風江山不到紅

塵眼半幅煙綃想像中

○附錄

白題中州集後

鄴下曹劉氣儘豪江東諸謝韻尤高若徒華實評  
訂品未便吳儂得錦袍

又

陶謝風流到百家半山老眼淨無花北人不於江  
西睡未要曾郎借齒牙

又

萬古騷人嘔肺肝乾坤清氣得來難詩家亦有長  
沙帖莫作宣和閣本看

又

文章得失寸心知千古朱絃屬子期愛殺溪南辛  
老子相從何止十年遲

又

平世何曾有稗官亂來史筆亦摧殘百年遺藁天  
留在抱向空山掩淚看

祗之遜兵南渡悵空源氏已推手更任晚年以  
善作自任曰石可令一代之流派而不傳乃榮多於



家寒暑不出有所聞見隨以寸楮細字紀錄之名  
 曰聖史不下百餘卷中州集其家詩一種也凡  
 十卷世三百字人其人私以富庶謙史臣  
 推為一代宗工真字亦美矣卷首載頌言二  
 作卷尾附至父兄詩尤見忠孝至子俯仰感  
 慨之意讀其自歎子絕句可想見云海雲毛

可為後

中州集纂終



中州集後序

百年以來詩集行於世者且百家焚蕩之餘其所  
 存者蓋無幾矣至於一聯一詠雖嘗膾炙人口既  
 無好事者記錄之故亦隨世磨滅元遺山北渡後  
 網羅遺逸首以纂集為事歷二十寒暑僅成卷帙  
 息欲廣為流布而力有所不逮第東置高閣而已  
 乙酉秋得真定恩學龍山趙侯國寶資藉之始錄  
 木以傳予謂非裕之搜訪百至則無以起辭人將

墜之業非趙侯好古博雅則無以慰士子願見之  
心曰贅數語其後云作詩為難知詩為尤難唐僧  
皎然謂鍾嶸非詩家派不應為詩作評其尤難可  
知之半山老人作唐百家詩選迄今家置一本曾  
端伯選宋詩不可謂無功而學者遂有二三之論  
予謂裕之此集今四出矣評者將附之半山乎曾  
端伯乎季孟之間乎東坡有言我雖不解書曉書  
莫如我是則又不知皎然師果為真識否也明年

四月望日頤齋張德輝耀卿書

後序

十一



